

**Uunga siunnersuut: Imigassaq pillugu Inatsisartut inatsisaata allanngortinneqarnissaa pillugu Inatsisartut inatsisaat**  
(Peqqinnissamut Naalakkersuisoq)

**Akissuteqaat**

(Peqqinnissamut Naalakkersuisoq)

**Aappassaaneerneqarnera**

Naalakkersuisut sinnerlugit Inuussutissarnermut Aatsitassanullu Ataatsimiititaliap isumaliutissiisummik suliaqarluarsimanerannut qujassuteqarpunga.

Ataatsimiititaliap isumaliutissiisummini uppersaqqaat ilumut maannakkut imigassanik aalakoornartulinnik 4,10 procent angullugu akuersissummik pigisaqartut, siunnersuutip akuersissutigineqareernerata kingorna imigassanik aalakoornartortalinnik 5,09 procentimik tuniniaasalernissaminnut nutaamik qinnuteqaqqaanngikkaluarlutik periarfissaqalertut.

Akuersissutitut maannamut tunniunneqartut inatsimmut maannamut atuuttumut aalakoornartullu annertussusaanut akuersissutigineqarnikuupput. Akuersissutit inatsimmut nutaamut aamma taakkunanga annertussilikkatut taakkartorneqartunut naapertuutissappata, inatsit nutaaq naapertorlugu nutaamik sullinneqarnissaq nutaamillu aalajangiiffigineqarnissaq pisariaqarpoq.

Inatsit allanngortinnerani sukumiisumik eqqortumillu isumagineqarsinnaaniassammat maannamut imigassanik aalakoornartortalinnik 4,10 procent tikillugu akuersissummik pigisaqartut 5,09 procent tikillugu qinnuteqarsinnaanissaminnut periarfissiisumik ilisimatitsissummik allaffigineqassat kommunit isumaqatigiissuteqarfigineqarput.

Malugeqquneqassaaq Kommuneqarfik Sermersooq, Kommune Kujalleq, Kommune Qeqertalik aamma Qeqqata Kommunia ilisimatitsimmata, maannamuugallartoq 4,10 procent tikillugu imigassanik aalakoornartortalinnik tuniniaanissamut aamma / imaluunniit sassaalliisarnissamut kommunerisaminni akuersissummik pigisaqartoqanngimmat. Avannaata Kommunia akuersissummik pigisallit amerlasusaat annikitsuararsuusoq nalunaarutigaa. Taamaasilluni akuersissutit allanngortinneqartussat amerlassusaat annikitsuararsuupput.

Ataatsimiititaliaq isumaqatigiilluni siunnersuutip akuersissutiginiissaanut inassuteqarmat naammagisimaarpara.

Taamatut oqaaseqarlunga Naalakkersuisut sinnerlugit siunnersuut taamatut isikkoqartillugu pingajussaaneerneqarnissaanut akuersissutigineqavinnissaanullu inassutigaara.